

康對山先生集

康對山先生集卷之八

七言古詩

丈夫行贈谷濟元兄令巴蜀

丈夫處世人莫知良驥在櫪空悲嘶仲尼相魯且不
稱求赤區區將若為昔予弱冠遊鄉校文章每出惟
君好遂與忘年二十春世人那得窺其妙今歲春官
君又歸暫同毛義慰親闈領邑不辭蜀道險作吏肯
令心事違科場自古滯豪傑子瞻何必青雲客會當
簪筆侍明光令人再觀搏風翮

送孫鏜

對山集卷之六

有客有客自河中春日訪予來武功手出長卷四五
軸凡所為贈皆鉅公羨君行年三十二能使世人知
姓字金殿羞言傳奉時藍袍自惜風流事一旦京華
汗漫遊頗令齷齪埋高致聞君家世傳英武賸積詩
書勤學古勵志須令竭死生成名奚必慚囚虜君不
見首陽山頭雪如銀人生那討百年身若將此義從
容去寧愧當時采薇人

相思行

相思雖深相見難於君况是長年別高義驚聞貧賤
初深情遂許金蘭結三黜誰知下惠賢幽居未忝東

方潔忽然感歎欲寒衣豈意逢君洛陽陌頗謂能諳
野鶴心不堪猶有雲泥隔河澗浪懼外人情東施豈
是傾城色含笑長歌策杖來三徑黃花半欲開沽酒
鳴絃謝人世爾曹碌碌何有哉

送馬天瑞還京

庚申長安一見君知君氣蓋千人軍正德八年定蜀
賊延綏健兒豺虎群此時

天子方西顧名公才將叱如雲君從制帥適經過老
眼拂拭知建勲果然三月破綿漢遂令巴蜀無妖氛
渭水秦山壯氣迴金臺恒嶽益崔嵬相逢意氣還如

昔愧爾經邦濟世才

元夜見晉歌者辛寶賈謐賈勝

教坊子弟幾人好獨有騰謐與辛寶十年不識五音
清一奏真令百憂掃幽居頗乏杯酒勞靜中却喜見
爾曹衣衫鵝結不蓋膝自覺藝妙心神高膏盡夜深
月將落猶惜知音促絃作我心感之雙淚流爾曹豈
係無依托古來志士咸若茲知己難逢老溝壑中之
所負安肯索

秋風詞

長安道上秋風起吹入青門草靡靡客子携琴燕趙

來一感秋風心欲死鳴鞭躍馬過我前那堪杯酒重
留連酒酣氣發百志奮談笑須臾空百年坐中歎爾
壯士心人事何勞問古今張蒼亦能論刑法君平徒
然卜六壬仲尼治國苦不稱曾參事母猶難信時勢
摧人著處生英雄遇抑常遲鈍南山磊磊雲氣橫寒
泉湍湍終日鳴請君拂袖謝人世與爾常為谷口耕
贈王顯之

壬申以來兵事煩甘州一帶如痺肘

皇上憂勤厲萬機群公感激殊奔走不刺禿廝入寇
初番漢生靈若摧朽西寧古來百事無關梁阻塞三

年久耕牧誰能出近郊輓運何曾見升斗碗粟甘心
賣少妻積屍頗欲如岡阜徒使將軍覓健兒骨餒安
能察身手西州豪傑王顯之受命觀風自分守查覈
須令極細微扶持豈肯辭傾仆彭公開府大軍來每
事常稱濟世才積粟偶爾數十萬軍門氣色從此開
二賊潛走陰山窟赤斤罕東如破竹耨耜還能闢草
萊牛馬何須論山谷經畧真令北海空勘讞那止邊
情服古來志士各有懷天下蒼生豈無福邇者宣大
抵延綏縱橫千里人煙淨天子宵衣發虎符元戎中
夜傳軍令徹塞徒聞哭泣聲當關誰殄殘胡命法度

雖存人事乖內備疎虞外何兢北虜終能作內愆諸
公慎勿重留連果能司馬安邊策好稱天官破虜年

寄劉朝宗氏

吾觀蒼梧之東有巨澤萬里一瞬誠叵測又聞北穹
幽都古奧壤四方六合同趨向風氣況當明盛時自
然蘊蓄生高尚予亦西秦古狂客羨子尋常獨豪放
義氣今無鮑叔牙風流故數陶元亮乾坤賦物原不
私賢哲膺時各有之騏驎雖屈迢遞心恢宏猶擅懷
慨辭錦本漢代執金吾貴盛豪華昔所無君子落拓
近亦少將相勲名宜自圖感君深意勸君保欲見難

為路途杳短歌微吟雖不長寄君聊見當年好

邯鄲美人歌

蘭氏小姬名鳳笙邯鄲美人獨擅名等閑一見萬金
賤何況逍遙翡翠屏精神婉變性情適自恨生身楊
柳陌陌上羞看遊冶郎鏡中愁作當眉碧學得秦箏
不肯彈却將針指湊齊紈鴛鴦刺就腸先斷掩却銀
牀獨自嘆

秋雨吟

十日一晴晴復陰斜風細雨何浸淫山根泥滑寸薪
貴水面苔生平地深神怒天摧或如此已看百穀半

將死饑寒盜賊着處生誅斬翻憂亂兵起徵求無度
民自難諸公徒爾嘆微官豺狼當道捕不得紛紛法
令何足觀忽憶成化甲辰歲公私克國網維繫
皇帝臨軒發禁錢細民尚作溝壑斃况復艱難至此
時

九重深嚴那得知臺諫徒陳利害策閭閻不見寧息
期斗粟尺布命所直吏促官輸轉相逼甘肅縱橫土
魯番商洛紛紜織染給中丞受詔不敢來此地生靈
一何極嗚呼斯民天所生州縣相看何太輕
祖宗宏業恢千古

陛下神武復英明一朝收取首事者會見爾曹雙眼清

送劉伯序

結廬遠人世倏忽將十年我心非土木安能忘時賢
君家豪爽世無有我意私君今已乂豈意今朝攜手
遊笑談若遺風雲走今君歸去赴岷城恨不同君萬
里行青門碧草意亦白紫綬黃冠非兩情我歌雖好
人難聽歌以贈君非漫興烹鷄炊黍事總佳翥鳳騫
鵬有誰並君不見英雄遇事若等閑世道升沉瞬息
間請君但醉葡萄酒丈夫勲業在朱顏

送吳慎之令銅梁

憶昔與子遊鄉學，襁褓影票俱總角。千人過眼無一
堪私擬，君才當穎脫。以茲常聽萬里鳴，豈意蕭條飯
藿藿。我昔應時官翰林，世間名士空相博。轉覺君才
近所無，垂老科場意羞縮。奮迅因求勾漏閑，聲華燁
燁今非昨。丈夫昂昂人世間，要使氣量青天闊。
國家名公不可數，俱向專城事民瘼。君不見漢庭黃
霸與魯恭，至今名譽振天地。何況當時為列公。

寄張士元

黃金臺上雲依依，黃金臺下水瀰瀰。臣今萬里去辛

苦安可辭但願

陛下壽萬歲使臣萬里無遺思

祖宗洪業際天地尺地皆土人咸臣之斬刈流徙惟
上所為遐方炎炎有肉不可食有酒不可卮况臣侍從
通文墀心之彷徨豈在此惟願

陛下有長期

陛下神聖古帝少臣心不為遐方老

王仁瑞梅花詩

十月君來許西口手出新詩百餘首苦詠梅花不肯
冰竒恠妖嬈體俱有君才儻眼底稀揮毫時遣較

龍走志士遺窮直所難羨爾豪華幾升斗近聞東訪
楊使君長安車馬動如雲杯酒相逢休極意世上萬
人徒紛紜不如早跨蹇驢去醉我東山翡翠裙

喜王卽再過

王卽再自府城來敝車羸馬心恢恢自言遊宴徧臺
省四座群公皆服才咲談之下走夷甫整歎未盡春
風開此語雖狂苦不妄可惜王卽無所裁勸卽舉措
休馳騫行履不藏閭里惡以爾聰明倜儻懷何必忽
忽若朝露少年嚙首取科甲榜中之人誰比數運徂
事已死卽休世上勲名乃天杜軒車駟馬雖可依覆

水烹魚理當悟豈若深居華岡子殢酒看花守玄素
從軍行

烽火西傳虜騎來天王按劍雪山摧將軍裂眦奮一
戰旌旗蔽日雲氣迴朔風獵獵天山遠曾冰齧石交
河斷材官爭取可汗頭諸君肯放明王返功成不日
詔承明賞賜先推飛騎營驍騰俱封二千戶錦衣朱
纓義氣橫聲名絡繹傳鄉邑甲第崢嶸開上京回頭
笑殺魯連子白髮龍鍾空一生

驄馬行

漢朝御史大權力丞相尚書果難及一朝直指持斧

來十道爭開冤鬼泣高帝朝儀本叔孫孝武英明體
面尊窮兵黷武盜賊起酷吏得志黔首屯暴生本是
屠沽子衣繡乘驄萬人靡長吏揮斤不敢前父兄烜
赫門如蟻夜夜朝朝樂事饒燕歌代舞霍嫖姚勢至
時違收請室鳥散雲飛百事消

秋雨嘆三首

崩墻壞壁人夜號比鄰處處通波濤明燈執蓋待天
曙片雲浮來聲益號富家或能飽鷄黍嗟嗟奈此貧
兒曹棧椽為薪麴為粥斗粟千錢肯相鬻

原上官道泥已深原下卑濕人怎禁四方極目盡明

水野菜可食何處尋綢綉匍匐宴筋力賓客逢迎甚
胸臆安得大禹鑿九州更使蒼生免昏匿

此雨初晴人亦狂為能洗却煩蒸涼那知狼藉遂如
此積陰鬱鬱行坐妨兒童階下戲舟楫風動襦帆行
獵獵不知何日墜蓮房亂向波心逐蓮葉

寄滕子冲

戊辰與子別京國一別十年如頃刻野人心性百事
慵尺書未入楊雄宅丈夫豪氣九鼎輕六品微官有
何得吾子風流近代稀新詩首首追曹植鵬飛鳳翥
變化殊龍挂蛟騰果安極有懷欲語誰可知尋常思

汝心如塞山東李夢弼河間李宗易人來往往寄我
書燕有篇詩如絡繹民懷昨日信亦至獨怪爾錫非
兼昔直卿山西消息無粹夫河內聲尤赫數君才名
先後無義氣上與雲霄浮愧我齷齪只飲酒未能彷
彿身後圖前日客從許西過歷誦諸君有程課此意
蕭條久不聞私心豈但同年賀廊廟山林各有懷好
景不常時易蹉願君努力思古人人生當作萬年身
有才上可報

明主坐令四海承經綸許西山水亦非惡斷壁懸崖
何磊落終南太白走其下清渭汧漳面相錯秋來朝

夕雲氣橫喬木森森鳴鳥雀中情泮渙何所櫻舊日
粗豪心漸薄或向西河學釣魚或向東原訪隱居割
鷄飲如壑跣足蓬頭奚愧作譬如野鷺山鷄被樊繫
一朝脫翅向空山玉桂金囊肯輕集達亦無所歡窮
亦無所苦我曹心事久不白禿顙安能為君數去年
二月經紫閣恠石驚湍陋天姥其下一里秦草堂古
人題詠橫如堵此時思欲與君遊擊筑徜徉歌石鼓
有時策杖瀑布間有時坐遠臨高岵此意寥寥不復
同因君歎息淚如雨

李節婦歌

鄉縣士大夫欲旌李銳妻之節而里子用之
引紀叔姬卒鄫之事謂不在厥后因賦小詩
辯焉齊之圖紀也紀侯命弟紀季以鄫入齊
求后於五廟由紀侯去國之後又八年而紀
侯死叔姬以紀宗廟由鄫始返而居鄫以奉
紀祀蓋有鄫則姬得以死國與說妻欲死家
而不可得者其事萬不同也而以此例之哉
銳死父文圓挈家就選遂盡賣其田宅當是
時銳妻雖欲如叔姬之居鄫得已成化甲辰
之石關中老弱相食父子兄弟散於四方雖

婦人無歸義當歸之宗國父母死兄弟蕩
然無存幸伯兄喬祿在故銳妻終祿雖借賃
而居亦異諸他人之室也今以叔姬之事例
之不知節婦之事於叔姬何不同也叔姬邦
君之夫人有與君同死社稷之義節婦庶民
之妻居無定業朝賃夕改又上制於舅姑跡
雖不同而心事一也夫道以無垢是尊婦以
潔身為操聖人之立教求其如是而已人豈
不欲盡年夫室以明婦人之義哉然翁姑怒
而去矣田宅盡矣欲死則弱息在抱圖存則

兄弟具遠加以年歲饑饉死者相藉使叔姬
於此亦將若之何哉婦人不出閨門竇氏二
女死於巖下彼巖下豈其家也苟無汚其身
而已矣此庶人之妻安可與邦君夫人比也
匡章之不孝非孟子之辯後世何明大抵予
之所著憂君子之論不明于時而已

武功節婦李銳妻節操直與青天齊夫子舅姑苦欲
嫁不從見逐何所棲阿舅宦去賣田畝妻孥俱作燕
臺走悲號墮絕夫塚邊血淚如波心欲剖遺息在抱
求死難欲守夫家豈能守吞聲自賃宗人居夜紡績

織苧糊口辛勤匍匐二十載息兒成長為人婦三十年餘舅死官姑來置屋比舊寬小叔家口自逼仄豈容老嫗供姑養紀侯去國紀季在叔姬故與劓宗對先後不免舅姑嗔立雖無地腸空碎小叔近又賣新屋西入汧陽不復東身計蕭條兄弟踈安得不就寡女宿庶民自與邦君殊貧人賃僦何弗居南里豸史苦執禮豈未盡諳胡氏書桓公元年紀已拔宗廟所繫情難忍三年遣季存餘劓吾君旣死身安極所以歸劓死宗廟謂劓如紀心所悼亦人鮮義自古然父子尚有耨鋤較尋常豈異不顧親區區嫠婦爾何人

聶孝婦歌

姑未老夫已亡事姑惟恐姑心傷妾幸不死得事姑
姑病經年惟妾扶但得姑好妾常侍那惜此身成骨
枯可憐阿母死時語願汝有婦還似汝不見賢郎喪
汝時三載居廬不出戶

雲將軍畫水歌

誰將此水挂堂壁春風微動波濤鳴光明閃爍對天
日浩蕩不息朝東傾西閫將軍妙齡客英武桓桓獨
心悅他日龍荒破虜時看爾風雲千載色

丹廬篇三首

客子有詣予談黃白術者殊戾厥旨因賦三篇示之

丹廬煌煌神德居勤以煉之道所須素女抱珠光陸
離青衣公子誠蠟匹洞房清瑩蕙帳弛鉗以玉鑰嚴
兩扉四座溫溫春風遲雨七勿虧丹已基徐出深閨
正容儀金鑪烈烈炎火馳承父之緒胤靈兒慎保護
之候良期兒復純大燦有輝修飾冠蓋過里閭長孫
肖祖性柔懿滓穢滌蕩肌若脂螽斯詵詵彌軒墀世
德逶迤安可涯黃赤白黑守境隅分限整齊誰敢離
九九既畢神化竒五金值之變本軀駢鸞駕鳳恣所

如千秋萬歲天與齊

其二

鉛晶既離神明希強以配對忘化機男女孳孕各有
宜氣血勝負精何施大樸既散元氣飛君欲用之事
反殊白為金精黑水基玄含黃芽原始初白黑混沌
入鼓池七日不輟真裏居被褐懷玉誠絕奇采之合
丹靈有餘升降揖遜必舒徐慎毋鹵莽為鬼唾吞嚼
既足審所趨毫髮乖謬道乃夷千百鍊之堅不移是
為道樞任汝之准上為之凡三尊鉛氣盡剝靈漸肥
萬杯一貫理詎渝準繩不造君勿為爐火之事鉛汞

意挈此玄理君何師

其三

火記六百盡微言子欲煉之須得傳二氣方媁宜自
然慎勿暴迫令有愆祥風暖日古所賢詰責統錄察
機權纖芥不正晦吝縣反復兩七定始先均齊諦視
轉精妍溶以上池俾真純若孩在抱母已捐配以姤
女投赤門再取再配慎勿寒八再再鎔之無憚煩鉛晶
銷絕体還乾點化澆漓唯汝便宗枝從此稱度蕃百
千萬億如景旋前後法度各有玄子若違之功不延
丹砂效此勿迷眩事既瑩潔效亦然大丹爐火體相

連則而象之令子仙

十九日即事

養雛自恨羽翼短翼長飛去豈思返老烏目斷東南
枝白日青天一何遠尾秃唇焦徒自啼啼殺老烏雛
詎知願雛養雛還勝雛慎勿齷齪如老烏

十六日聞張甥之架訃

於戲人生百歲少適意為樂幾時凶變生頭秃齒豁
復丁此兒女之際胡為情生女必欲嫁好婿此婿此
才誰與京文章欲窺班馬戶盛代科場先得名共和
不實意安洽孝道因心人詎能三十二歲倏殄滅我

口不語心獨驚遺汝大人百志歎辛苦生男安所成
孤兒嗷嗷雙女泣死者不聞生者悵親戚哀毀豈滅
性天高地厚嗟何及強嘗醢醬且隨人背食粗糲甘
若蜜青梁之子忽如此痛苦在心情可已憶當西堂
群試時等閑所作俱高致含弘那許世情移見者都
誇公輔器此日重淵喚不回地下修文豈虛謂我歌
欲轉音復哀鬼神有靈安在哉百年過眼若旦夕汝
志不伸人盡惜幽懷咄咄欲寐難城烏伊啞東方白

四月三十日雨示德充

昨日有雨塵不洒今日雨多雲更長暹天四望無寸

碧野人稼穡何所妨頃聞江淮人相食父子不保况
路傍關中雖無橫盜苦邊餉轉輸日相望麥豆半為
風雨蝕我秋未布人皇皇晨興東出望雲氣晴天赤
日心自傷千歎萬息日將晏天風不動簾影黑須臾
雨脚下平地遂噴何常萬馬力向夕雖看懸溜微達
旦霏霏雨如織喜聞優渥遍九土倏忽之間信難測
天地之德本好生大塊豈厭物生成入身殆逆百體
滯氣運所生誰可明豐年弗儉歎時極却與造化生
挽拾安得官長息雜役令此黔首俱深耕禁侈薄歛
久自足何必義倉與長平

有所思

有所思兮乃在天一方徘徊不可見反復令心傷秋
雨霏霏庭院空思逢君兮君莫逢流蘇羅帶那復展
階下梧桐生悲風

西谿醉歌

西谿草堂春水深西谿主人谿上吟割鷄把酒勸客
醉少小幾時衰老侵朱顏白日休自負請君試看芳
春林我聞此語倍感激世上幾人如此心明朝何不
出美酒更與東眺華山岑

東山圖

張侯風致人所無走使示我東山圖展玩數四信絕
筆問君此物奚來乎懸崖恠石幾千仞鳴泉遠自天
河噴衝波灑沫沉日光松料參徊與天近江東夫子
廟廊材何心苦愛此山遁海內捨攘晉祚衰強臣雜
虜聲相震志士猶懷異代悲英雄况覩當時運豪華
紛紛左右軍虛名實害動愁人不若恣意向巖壑閑
窺石壁靜怡神洞房露下空青滑松徑春深花鳥馴
此時坐嘯樂已極况有蛾眉翡翠裙蛾眉翡翠殊妖
冶急管繁絃曲難寫浮雲欲住芳草青萬態千嬌益
瀟灑前遮後擁迤邐陳可憐歲月如飄瓦襟期未與

世推移羅綺寧關身用舍新亭手板壁後兵始信時
危湏大雅張侯收此豈無意人情所愛皆身似博學
期登白虎堂成名却掌中牟車撫卷因生感慨懷遂
寫長歌為君寄

聽韓景文彈琵琶

關西弟子彈琵琶武氏成名已三世勝死忠老傳授
稀尚肖已近六十二要妙誓不教女兒精微安肯輸
同事武功少年韓景文杳撥檀槽酷能似然打鉤挑
色色精調停布置俱神異大曲渾涵小曲嬌群宮衆
調無窺避始知絕藝本天成誰云末技非難致清秋

八月賓客來尊俎未列管絃開立酌停歌兩三醖此
聲一出人盡駭倉庚微吟柔桑底凍竹乍裂洪園隈
遊蜂逐萼遠不歇曲嶺回鑾繁更催千山夜落九天
雨空谷朝驚三月雷悠揚拂棹轉相勝聞喝遮互清
且哀鉄騎橫來長樂坂神女坐對陽雲臺閑庭翻絮
去閃爍絕壑墮石來磳磳曲曲宛轉意態別三百四
十猶往回憶昔京華公宴日教坊子弟紛紛出三院
都輸張學彈數年頗會聲音悉以此常誇武氏高汝
今操縱如畫一夜深客醉滯屢更四座嗟咨未忍行
曲終更奏不知旦戶外驚聞繁雀鳴

蜀山峨峨

蜀山峨峨漢水湔湔兒來既不易兒去誠已難嗚呼
皇天奪我老母使我倉皇奔逐不得前拊心欲訴誰
可言我父舍我早長遊恨不終日侍母邊南山可摧
海可涸此身乾斃往安托

傷軹軹可父之子族之子姓莫強焉讀書習禮
駸為成人倏爾告亡涕泗交頤哭之以詩志
予傷也

吾宗有孫子玉質光嶙峋總好紙墨事敏捷如有神
溫克過諸父私為予所珍緝學綠野忘寒暑奮志直

欲追先民大美不竟乃夭折使我痛哭聞者辛汝死
不復作我哀誰可陳少年弱冠隨鬼錄爺孃兄弟哭
聲直上千清旻埋玉於土幾時出荒郊日落惟孤墳
孤墳三尺生秋草愁殺東西南北人

瑞州太守行

瑞州太守鄺廷瑞瑞至之日賊方驚手無寸鉄兵衛
空健兒聞驚皆逃避郡吏不敢更趨承苦諫當虞身
後事四境安危係此身太守一逃何以徇當衙一呼
士爭奮始信英雄氣有神賊兵星散城已保轉顧因
知寇所巧焚破欄殺歛近民賊失所資如逝鳥至今

瑞郡立生祠君與劉侯如在茲丈夫尋常薄鍾鼎殺
譽升沉何足疑嗟嗟貝錦者誰子謗君番使君名起
蓋棺事定古所傳才去幾時民若此天道恢恢監獨
明區區豎子胡為爾

送席給事彖判夷陵

扶輿之內惟人最靈禮義所閑品物乃成四維弗張
人滅天頌細氓弗忌君子是兢一綫不絕其幾豈輕
今夕何夕與子逢迎握手述志嘉言盈庭感君之意
慰我平生酌子以大斗兼之以椎鳴聞君遷謫萬里
去君懷磊落令吾驚湘澤之賦賈生弔屈平而傷情

忠臣之死志不滅况此芥蒂何所
後斯文眼底掃地
盡齷齪往往偷高名我肉可裂舌
不可轉兮吾不如
妾婦背非面是而來榮譬如已墜
而復起已死而復
生精意直與上帝許皇天寧不監
爾之忠誠夷陵山
水亦改色嗟若直道昭汗青君不
見長安道上紅塵
起千秋萬古永不歇誰見當時浮
薄子

席侍御過予言乃兄方伯公少時
夢涪江漲落
得碑刻曰三仲聯芳未幾方伯公
登第又二
年季弟給事君與侍御君相繼亦
第位既顯
願名復芳烈夢之足徵有若是者
因群公之

賦倚而賦之

席侍御溫以貞方伯之弟給事兄手出一卷皆鉅作
授我讀之嘆且驚傳巖之夢古所信掌夢况是周官
名精誠契合理自異靈氣萃會寧肯輕高科顯宦世
雖有豈若君家昆與季昌時次第傳令聲山可摧兮
地可裂此聲千古恒光明方伯長厚近未覩雄文絕
藝鳴西土給中初官骨鯁聞世間男子誰比數况君
新自翰林除風骨飄飄氣如虎片言已識冰蘖心終
身肯放鯨鯢侮蜀中累代擅賢豪不似君家兄弟曾
袖中長劍光如許幸掃挽捨翊 聖朝

青門歌

人生會少離別多握手送君君若何青門芳草四溟
瀟蒼渭素漣生愁波今日送君歸何日望君至憐君
磊落人紛華亦何事長亭山色遠近開與君酌酒願
君醉此去當為遠別離離愁漠漠心如碎楊柳青青
知為誰鳴泉日日摧歸騎歌者且勿停行者且暫憇
灞陵橋上西日馳朱顏那許人恒駐君才特達近所
稀許身當作青雲器況茲先後被恩私閑閱崎嶇茂
群貴從來將相出名家涪魚鰕鮒空相覲願君拂拭
星斗文莫使塵氛等閑蔽離別雖難兒女情行藏頗

涉英雄事酒酣長揖各自歸明日相思渺無際

世爵堂宴歌湖子

故人在眼幾人是今日見君心欲酸西堂設宴奉高
會佳期古來誠已難肇遊慷慨竟不歇老去風流還
自歎長生有訣未一試頓令白髮摧朱顏仲連豈是
魯男子孫登寧愧石門山卮酒奉君為君壽筦絃瑣
瑣何足言

憶昔行

憶昔同子雲霄上志意逍遙隨所向豈知今日老會
來臨風握手增悽愴邊城七月秋風寒大河蕩蕩無

殺湍君今匹馬甘泉去撲耶胡沙行路難

玉女泉

玉女泉西有石室水落龍潭波滴滴笑殺東京馬仲
長駐此何爲忽飄逸平生絳帳縣絲竹數十蛾眉列
華屋泉頭習習秋風生不見當時環珮聲古來大美
小難妬愛爾千年文學名

對山集卷之八

康對山先生集卷之九

七言古詩

將餞明叔值公垂至不果先寄明叔

欲餞美人詣彭麓更值故人來
潯西藍輿已駕復自咲咲已入門還索題
晨來鳥雀噪不止豈憶佳期忽如此呼兒酒
掃開東堂漉酒徘徊意彌喜人生會合誠獨
難誰謂相逢介卒開東谷主人且微憇明日共
汝遊南山

華山篇

華山高兮幾千仞煙雲終日橫其巔中有仙人受靈

藥刀圭入口壽萬年天方先生紫霞史下謫尚有雲
霄思榮名耻逐世人機高風獨耿昌明世歸隱忽經
三十春賢郎頭角更驚人文章已可報
明主林壑何辜自在身聞君欲訪蓬萊祕萬里天風
豈難致歸時尚過華山頭與君却話希夷事

岐東宅聽歌

予醉鳳泉酒汝歌羽調詞調聲轉迫已知無過度綴
吟應自竒岐東主人喜賓客留我更出黃金卮金卮
更出從何始千呼萬喚金陵子綺坐都鋪氍毹香
塵細逐雕梁起仙姿豈用粉黛粧羅衣不受東風靡

坐客徒驚玉貌無當歌誰辨希聲美岐東岐東君自
知此子此歌令我疑不知東山謝安石所携與此誰
妍媸

疆場村

渭南西北疆場村無數桃花開華門高陵到此已卓
午滿路風沙愁斷魂去縣尚有三十里僕夫噉噉默
相語地慘天愁行路難豈知主人心更苦五字先拚
數莖鬚千金不及步兵厨太微處士興恢闊高風常
候城西隅何時身坐少陵洞共渠細倒水晶壺

題王秀才牡丹圖

何日到吾家牡丹應著花開圖一見興已發遲似當年宴紫霞雕欄不受春風抑綠葉紅蕤舞風力終日迴旋不肯休根株苦披丹青匿遠路遭洄銷客心夢魂惟在草堂陰牡丹牡丹吾語汝三月八日始穀雨

夜宴孝夫宅

憶昔正統天順間渭南薛丈同先子關內通稱夫子名二老實為天下士以此通家數十年善行嘉言時在耳後嗣全如兄弟親前脩自篤謙恭禮往歲逢君巴蜀歸厚意遲遲還若此愧我踈慵未敢當聞君談論心私喜

盛世自宜英邁人迂儒豈識經綸理蕭望難居侍從
官賈生肯與絳灌比司馬逍遙忽見疑誰知中道生
妻非治君無能返異才看花尚切群公齒丘壑徒深
社稷憂

廟堂獨忍乾坤否春暮閑遊少華峯逢迎幸辱賢橋
梓握手那知感慨生醉歌不覺稀聲起君臣之義君
莫忘還期三月下和陽用舍自為大臣事顯晦豈為
吾道妨君不見崑崙黃河天上來銀濤雪浪如山摧
不遺涓滴盡入海誰謂海門開不開

南谿泉池歌

此池故無許今來心自疑泉源不為后土抑特與幽
居扶勝竒水北主人冰雪姿携我每來遊此池往時
坐弄已適意即日行吟尤所宜玄靈本自灝天圻佳
處獨令豪俊知君不見秦嶺以南水無數洶湧滴蕩
誰更嗤愚公之溪一掬耳此水此名非公誰

閬家渡同呂王二君作

美人約我遊湯泉明日同之清渭川日中我抵閬家
渡不見美人心自憐嘉興太守清狂客肯使相逢倉
卒還天昏雲暗古道澁思君不來空佇立金銜白馬
中夜嘶青尊碧碗嗟何及達旦不寐芳意衰空庭露

下蒼苔濕明星漸低人漸喧起來翹首望西原原頭
不見車馬下戶外空聞鴉鵲繁

南墅草堂

南墅草堂春可憐我來坐之心灑然名花芳草秀如
織翠壁蒼崖當坐懸主人本是清狂客築居故與塵
氛隔興來吟望夕未休素心淵思誰能測坐間嘆汝
青雲姿正好彈冠向盛時胸中已富書萬卷射策君
門誰更奇何為苦向此中隱笑殺長安輕薄兒君家
閨闔世無比褭殺高風貫青史兩兄一弟並雲霄憐
君尚且沉桑梓天子垂紳需俊才諸生奮翼秋風

裏佇看四鳳起殺函豈獨光輝照閭里

陌底

陌底之南河北隈木末駢駢雙騎來褰輿致語意益
謹手出新詩若瓊瑰高陵夫子謫君此俗易風移世
莫比以我十年不覲情相見何須論阨厄

王總制維綱凱還歌

秋風清秋草黃胡馬橫飛欄河梁材官奮擊胡馬盡
幕下生致月氏王憶昔先皇全盛時六龍結駕親出
師朔方健兒佩金虎人人思奪胡馬騎胡來趲趲其
旋如雷萬夫發弩不能一摧豈知神武本不殺喜功

不至胡為哉吾聞天子之守在四夷爪牙之士皆熊
羆朝中但有荆山老莫怕邊風疊鼓聲

春莫嘆

今日復春莫芳華能幾時今人不見昔人樂今人之
樂昔豈知巖泉沸沸沼翠微我坐溪頭看絮飛輕颺
依約杳無定明日相逢安可知去年謾作華山客對
食不能心自惜此時空作山中人閑情人事仍相迫
苦憶同袍三四君郎有稀聲誰更聞不如殺雞飲美
酒醉時遙望南山雲

答太微潯西行

結廬事場藿徒欲食其力世人那能知謂我謝親慙
平生無遐思長往將安極種樹森森高擗天栽花謾
喜多穠色苟使徜徉終此身敢向長天振雙翼諸君
義氣如古人訪予幽壑滯芳春興豪那憚三百里筆
落欲掃千人軍君和紫芝曲我草北山文層臺日夕
雲霞動嘯弄清波漾綵紋廬女當絃歌白紵飛花飄
上石榴裙於時君醉我起舞空林鶯燕如相語眼底
韶華取次休人生適意能幾許往者閑遊翰墨場羣
公以我似班楊雕蟲徒使為身累安知山林歲月有
此長我家桑落近所少與君斟酌各千觴安石東山

已塵蹟後人詎識吾曹狂君不見葛洪苦慕不死藥
從令紅顏坐消爍長生有法遇者難不如逢睞先行
樂逝水無迴波習魚無縱躍徘徊歌汝濟西行却把
空囊笑東郭

濟東觀園

我非漢陰叟灌園漳水東處世本無機巧心胡為桔
槔懸此中國丁再拜向我語此意千古誰可通舟車
亦是古帝作胡不辭去存古風言者自有託讀者自
無窮坂泉之戰至今誦安用區區矢與弓

九月十九日步過濟西

老夫今日來潞西潞西景物何淒淒庭垣半倒堦地
折孤鳥嗷嗷深樹啼昔余治此望終老常攜稚子尋
梨棗二十年來百志違山妻謝去兒復夭遺我伶仃
樂思無此身雖存骨肉踈行吟水際力已憊况謂能
生千里駒憶昔弘治歲己卯山妻結髮慈幃好兒女
滿前歡笑多朝夕承顏更何惱今日荼毒結我腸萬
事過眼俱草草繁憂苦人驅遣難因擁籃輿過此間
那知破碎忽如此今予坐嘆淚潏潏

古人慎恒節行

古人慎恒節今人重虛名蓋棺事乃定虛名終底成

年譜家乘死後物人人傳刻人人輕那知身去事委
地蛛網育門親者避製作徒為覆瓿資宣彝真似兒
童戲臨風三嘆欲語羞丈夫處世何須是請看李杜
偃蹇徒千秋萬古安能弊

答趙翁

爾本幽棲者訪予何太頻共坐感君意因出潯西春
潯西春酒世難見與君斟酌寄情親昔年李白在宣
國往來惟愛敬亭人丈夫心事遽難說看爾豈是尋
常倫明朝莫惜再相過尚有甕頭三斗醇

雨晴

雨中看山好雨過山益佳笑予愛山久成癖竟日偃
蹇坐山齋山色穠淡俱有態變化不但雲與霧此身
安能生羽翼因之南去視丹崖神仙雖有法未得玄
鶴安肯降我階唯待勾漏鍊砂熟却共盧敖遊月街
費時懋竹屏歌

君家竹樹上千霄喜予東邁時能至戶牖常看拂翠
雲庭階每坐生芳思屏中主人逸少姿風流磊落誰
能似賓客如逢蕭史來憑君莫話乘鸞事

送尹員外還蜀

去年五月二十二送君北躍朝天轡今年此日君復

來更覺君懷有幽致豪俊逢時自古難羨君倏爾陟
清班苦心高節通明主鄙士貪夫俱厚顏坐我前除
話今昔頓令涸澤生波瀾君歸梓里晝衣錦不但光
輝照庭寢重來應是莫秋天再向西堂邀月飲

效賦長安美人歌

長安美人十七八長安陌上車軋軋錦衣縠袴坐樓
頭水精為簾玉為闌琵琶一撥心緒煩未竟梁州淚
已彈春門公子人如玉宛西寶馬金作鞍尋聲走上
樓中覓密語幽情附耳傳酒盃未醉羅幃暖一時已
盡如花顏可憐會少別離多別去匆匆三十年容華

銷盡不知處夜夜深閨空自憐

短歌行

青樓下矚垂揚道紅粧結伴尋芳艸脩眉照月翠雙
彎香撥琵琶笑春早五陵年少賤黃金一聽嬌歌意
便深千金願買芙蓉幕不願千金願一心須更樂盡
夜囟白歡去悲生心脉脉人生拘束朱顏飛翻羨幽
州胡馬客

送符上玉

太白蒼蒼渭波碧空林烟暝朱絲劇歸期應在菊花
天酌酒相看意安極此別與君心事違岐路紛紛欲

語誰相思每到曙光出愁見階前芳艸菲

別客

別君東去君馬遲白日青春安所之携榼酌酒古城
下急管繁絃心轉悲君不見世之男子重交誼忽謾
看時舊情異不如水邊楊柳枝年去年來綠相似

晚行灞水

昔行灞水踏芳艸今行灞水雪皓皓人生栖泊少定
時比去南來何潦倒暝色遙看下漢宮彤雲又見起
新豐征夫膚裂指欲落欲行不行悲朔風君不見道
傍古基半傾圯知是當年誰氏雄

華陰逢朱孔明劉世常二子還武功

羨子老來還爾健微官能破萬里行人來忽傳近日
事我口不語感我情市井亦能領州縣儒生咄咄空
無成可憐世長亦白首少日雄心今在否仙郎俱熟
文字科不在君身在君後世事悠悠行轉難丈夫自
古蒙塵垢我今沽酒君莫辭人生百爾難遽知傷心
却憶塞翁馬不如且醉金屈卮

順德別表第拱辰

客車北去君莫留客心日日在西州滿眼空含秦陵
淚肯以富貴為楚囚君才俊逸應知此人生適意胡

不止後歲重陽予定歸當訪秦餘赤松子

真定王中丞院中有感

中丞論事久彌壯老至一生人未知有時慷慨盡微
細眼前豪傑俱堪嗤君不見一言誤國古來少衆口
哓哓空懊惱又不見美人登臺醜婦忌歲月悠悠水
東逝

擬短歌行

君不見城東少年遊青絲金勒凌五侯又不見城西
少年遊名姬麗曲當朱樓眼前有酒不知醉過去韶
華空自愁

惟荷詩

主人新開西小堂種蓮欲見蓮葉長翠稍扶雨滿池
出紅苞何日拆新香客至看花休索寞且向池旁作
胡樂嗟爾何不繫繫垂明日西風恐花落

燕歌行

浮雲森森銀漢明繁燈繡纈陳廣庭山林木落歸路
真與君相見寫平生美酒不御何所撓

朱門

朱門翠戶文綺車秦謳趙舞白縠紗堂前碧甕酒如
海醉後雲鬢人似花可憐不是幽州子擊毬舞劍翻

翻起座客俱誇轉折圖傍人那識便旋耻舊時名藉
場屋驚如今齷齪羞鄉里不念猶堪愛肉軀莫棄平
生容易死

符上玉携酒過濟西

故人騎馬來濟西鷓鴣雞一雙親自提筠籠十魚錦鱗
碎村酒滿尊猶帶泥瓦盆斟酌夕陽下狂歌坐嘯俱
輕灑却笑當年陸士龍平生枉作風流者

聞故人楊用之有書付鄉縣親友責望賤子因
成小詩自見

故人念我長孤曠遠將携我雲霄上此意優遊情自

親寧知賤子甘踈蕩二十八歲對麒麟尋常不數江
都相治身妄欲比臯夔堯舜君民復誰讓自信絕無
一綫瑕何堪早被三夫謗謝役常懸萬里心還耕未
恆辟兇詎以茲感嘆辭故懷隨時爛熳沉歌唱要使
終身罷宦情何妨盛節勵微諒阮藉窮途事已然謝
安東嶽同高尚截木何嘗見附枝驚禽自昔無留颺
粗懷每信絕櫻經丹心肯致埋光亮卞生務子亦自
豪谷永揚雄是何狀楊修媚世素所慚苦節隨心死
無快君不見世間之水幾千萬異派殊源各東向丈
夫磊落苟如爾粉胸繡臆安能誑

雜詩

蘭膏欲盡山月明披衣起坐心未平憶昔別子邯鄲
城寒泉泠泠雲氣橫曲堂獨自誰共情珍珠玳瑁委
閒簾安得握手話平生黃金白壁咸所輕

與仲木涉武水登東原入韓店道中

春風薄林林翠浮繁泉汨汨旌轡游送子東行還故
丘傷心握手增百憂歲月何亟逝難留嗟余雙鬢今
欲秋燃燭夜話興豈休歡會何短愁何悠深山孤獨
少人儔中情交結涕泗流吳刀楚佩蘭桂舟我欲遠
去辭此遊驚濤怒石路轉愁強欲從之執莫由悲歌

忼慨意益慘誰識此音臨舊侯

新寨佛堂奉謝錢送諸公

群公携酒隨珍饌送余西去岐山縣雨晴轉覺天氣
新鳴條更識秋風面不須絃管心自佳況有清歌沸
堂殿酒酣欲起客更留隋陵山色與雲浮生年七十
幾時耳不飲令人空白頭憶昔供奉金闥日終南太
白徒為恤經櫻難愜靜遊心投閒肯負山林逸此行
真已遂孤懷訪舊尋幽百事諧山人義氣多慷慨不
醉重陽定不廻

扶風西原逢張丞邦彥馮秀才顯庸携酒相違

因與痛飲樹下

主人愛客知客意遠出郊原待其至樹末徒聞尊酒
香車裏那猜車外事須臾齊向車前立含笑不言但
長揖誰家場面雙磚存展放杯盤出供給情真義合
今古稀入手杯空若鯨吸山遊本棊山水佳潛行友
被賓朋薰醉來與子各狂歌此日相逢如樂何君不
見原頭高塚映殘暉斷碑剥落人事非英雄馬寶今
安在惟有秋風吹客衣

聽歌

十年謁帝雲霄上等閒不省人間唱解綬重來隱舊

山始覺新聲能蕩淥清秋雲靜天宇澄寒月皎皎流
空明夜坐誰知省絲竹初翻已羨嬌鶯鳴鳴鶯語燕
紛難定杳撥琵琶各相競小歌宛轉太歌驚抑抑悠
悠無定勝遇雲白雪空記聞柳葉桃心亦浪云歌指
總能驚四座當臺不必和千人地主多情猶未許更
絃換節移律呂意妙寧憂曲不新才高逾遭稀聲舉
諸公嘆息口不絕由來調好輕顏色却笑當年杜牧
之尋常在作風流客

周公廟古楸行

岐山西北周公殿迴山揖岫紛如靛殿前古木無數

交老楸鬱鬱當前面根盤后土誰能測何動雲霄人
共羨風來掃拂剝山壁雪重崔嵬若驚嚇此楸植此
知幾年十人聯臂圍難徧歟皮怒起蛟龍甲鳴葉酣
同雷雨戰群公觀視各嘆息始知靈物非常見秋空
漠漠雙鶴來岐山千疊雲錦開覽時撫景雖多暇昔
日古人安在哉方今群盜各艸竊河南河北俱愁絕
焚灼渾無片瓦存參天那討孤標子豈係朝廷約束
疎由來長吏風聲缺徐李俱傳治郡豪蘇生亦是郎
官傑保護須令盡細微扶持未可辭襟袂憶昔西周
全盛時越裳航海亦來儀熙功隆效今猶赫況在當

年親見之自從秦轉東周後王室削弱如培塿八百
徒欽寶曆長一綫誰憐延虎口我茲憇此百感生諸
公各爾負特名幸逢天子憂勤日好遣周公禮樂行
出周公廟觀望終南山

已出周公廟忽望南山巔南山崎嶇天下無終日紛
縕凌紫烟日夕逾覺氣象好千峯萬壑爭妖妍稍西
乃見太白雪嶠嶸峒尤孤絕半山橫出霞彩明一
路平連翠華揭山下看山山始佳那看清渭東南折
水氣蒼茫薄近林烟光蕩漾接層岑鳥飛驚度知何
極古往今來空自深我愛太白山因逢太白叟短髮

垂垂被兩肩杖頭笑指駱谷口人生不得常朱顏車
塵馬足胡為走君不見建章栢梁惟土丘斜風細雨
令人愁又不見赤松黃石殘霞去至今猶向山中住
山中歲月不惱人碧艸蒼溪日日春欲鍊還丹謝人
世無如此處問迷津

別湯逸人

知汝新從南嶽來可曾開眺葛洪臺葛洪仙去已千
載金鼎丹砂安在哉伯陽空有參同契世人不知皆
浪猜前年我見王子晉頗謂君為物外才聞君又欲
湘江去遣我誰同濁酒杯佳期渺渺空遲莫我望湘

江但烟樹道成煩語赤松君有書寄我雲深處

夢遊天柱峯歌

往與歌湖話山水為我常誇天柱峯此峯奇絕世稀
觀對之即可開塵胸昔者西歸舍峯下徘徊三日興
轉濃白雲不斷挂天碧玄鶴時棲迴澗松恨不羽翼
過虞阪并覽五老金芙蓉庚午季冬日在丑夢與歌
湖載春酒驅車忽至王官谷倚伏晴陰狀俱有瀑布
雙懸白玉虹輕烟淡鎖丹霞口內有仙人安期生笑
予陸海沉淪久袖中授我藥一丸服之壽可三光後
愧我東西南北徒身外浮名亦何有

華州贈王二

人生一別常十年百年能得幾回別相看慚大迹慚
踈憐君義氣無時竭眼底紛紛不可言諦觀誰是人
中傑當時長道看君才豈得尋常老岩穴君不見青
萍在匣塵土封不若鉛刀在手中張華拂拭夜衝斗
區區之器胡為有

觀興菜

汴東種菜菜已熟數畝興來不盈轂積陰地冷生意
微枯禱空自勞童僕連年種豆無一成綠雲滿地陰
雨扑家口嗷嗷三十餘此菜安能佐饘粥往歲寧無

恒雨時不似今年太翻覆三月浸淫到中秋天日不
瞻魚走陸農家處處守場禾官吏紛紛飽梁肉深山
雪凍新不來男號女啼聲相逐水不潤下洪範嗔願
以波濤注空谷雨暘時若年歲豐我菜全無心亦足

對山集卷之九